



BOSNA I HERCEGOVINA  
PARLAMENTARNA SKUPŠTINA  
PREDSTAVNIČKI DOM

**Komisija za ljudska prava, imigraciju, izbjeglice i azil**

Broj: 01/5-011-1300/03

Sarajevo, 13.10.2003. godine

**Z A P I S N I K**

sa 7. sjednice Komisije za ljudska prava, imigraciju, izbjeglice i azil (u daljem tekstu: Komisija), održane 22.9.2003. godine, sa početkom u 10,00 sati.

Sjednici Komisije prisustvovali su:

- Elmir Jahić, predsjedavajući Komisije,
- Martin Raguž, prvi zamjenik predsjedavajućeg,
- Tihomir Gligorić, drugi zamjenik predsjedavajućeg,
- Nadžida Mlaćo, član Komisije,
- Miloš Jovanović, član Komisije,
- Ruža Sopta, član Komisije,
- Selim Bešlagić, član Komisije,
- Muhamed Altić, član Komisije.

Sjednici nije prisustvovao g. Munib Jusufović. Od gostiju, sjednici su prisustvovali: poslanici koji su podnijeli amandmane na zakon: g. Ćeman Mirsad i g. Beriz Belkić; pomoćnik ministra za ljudska prava Bosne i Hercegovine g. Mario Nenadić i zamjenik Šefa Odjela za obnovu i rekonstrukciju u OHR-u, g. JaysonTaylor.

Za sjednicu je usvojen sljedeći

**Dnevni red:**

- 01. Usvajanje zapisnika 6. sjednice,**
- 02. Rasprava o Prijedlogu zakona o izbjeglicama iz BiH i raseljenim osobama u BiH,**
- 03. Izvještaj podgrupe Komisije o predstavi grupe građana sa Tržnice Arizona,**
- 04. Tekuća pitanja.**

Ad. – 1. Usvajanje zapisnika sa **šeste sjednice Komisije.**

Nakon usvajanja dnevnog reda, predsjedavajući Komisije Elmir Jahić predložio je raspravu i usvajanje zapisnika sa šeste sjednice.

O zapisnicima nije bilo diskusije.

**Kako nije bilo diskusije, predsjedavajući Komisije predložio je usvajanje zapisnika, pa je Komisija jednoglasno usvojila zapisnik sa 6. sjednice Komisije.**

**Ad. – 2. Rasprava o Prijedlogu zakona o izbjeglicama iz BiH i raseljenim osobama u BiH,**

U uvodnom izlaganju za drugu tačku dnevnog reda predsjedavajući Elmir Jahić ukazao je na činjenicu da je ovlaštenu predlagač zakona Vijeće ministara BiH dana 1.8.2003. godine dostavio Parlamentarnoj skupštini Bosne i Hercegovine Prijedlog zakona o izmjenama i dopunama Zakona o izbjeglicama iz Bosne i Hercegovine i raseljenim osobama u Bosni i Hercegovini (u daljem tekstu: Prijedlog zakona) radi razmatranja i usvajanja. Predstavnički dom Parlamentarne skupštine Bosne i Hercegovine je na 17. sjednici održanoj 7.8.2003. godine usvojio zahtjev Vijeća ministara BiH za razmatranje Prijedloga zakona po hitnom postupku u skladu sa članom 104. Poslovnika Predstavničkog doma. Predsjedavajući Komisije je istakao da u skladu sa navedenim članom Poslovnika rok za podnošenje izvještaja nadležne komisije (član 84. stav 2.) skraćuje se za pola, a taj rok danas ističe. On je ukazao da je Ustavno-pravna komisija Predstavničkog doma Parlamentarne skupštine Bosne i Hercegovine na 13. sjednici održanoj dana 3.9.2003. godine razmatrala Prijedlog zakona te aktom broj 01/1-011-1191/03 utvrdila postojanje valjanog ustavno-pravnog osnova za donošenje ovog zakona, sadržanog u članu IV. Tačka 4. a) u vezi sa članom III tačka 1. f) Ustava BiH, kako je naveo predlagač, te utvrdila da se ponuđeni tekst može uputiti nadležnoj komisiji u daljnju zakonodavnu proceduru. Predložio je da se na današnjoj sjednici Komisije, razmatraju principi i članovi (norme) predloženog zakona, kao i predloženi amandmani. Konstatirao je da je do početka sjednice na Prijedlog zakona uloženo nekoliko amandmana od poslanika i to: g. Beriza Belkića, g. Mirsada Ćemana i g-đe Ruže Sopta. Predložio je raspravu.

U raspravi su učestvovali prisutni gosti, podnosioci amandmana i članovi Komisije.

G. Mario Nenadić, pomoćnik ministra za ljudska prava i izbjeglice BiH je istakao značaj predloženih izmjena i dopuna Zakona koji je donesen i primjenjuje se od januara 2000. godine. Na predložene amandmane se ne može očitovati jer ih nije ni dobio.

G. Tihomir Gligorić je istakao da predloženi amandmani donose kvalitet Zakonu. Istakao je da se neki ponuđeni amandmani malo međusobno sukobljavaju. Založio se za jaču participaciju Ministarstva za ljudska prava i izbjeglice BiH u rješavanju ove problematike, a priklonio se amandmanima koje je ponudio poslanik Beriz Belkić. Predložio je i prihvatanje amandmana g-đe Ruže Sopta.

G. Beriz Belkić, kao predlagač određenih amandmana govorio je o njima i iskazao mogućnost da odustane od svog drugog amandmana, ukoliko se ponudi bolje rješenje.

G. Ćeman Mirsad je obrazlagao svoje amandmane. U njihovoj izradi, rukovodio se potrebom da Vijeće ministara BiH imenuje Komisiju, a u članstvu Komisije treba biti ministar Ministarstva za ljudska prava BiH. Ujedno se založio za rješenje da se o listi za izbor članova Komisije glasa «u paketu», pa ako lista ne prođe da se radi nova.

G. Raguž je u svom obraćanju ukazao na motive donošenja Prijedloga zakona, kao i amandmana. On je tražio jačanje uloge Komisije i smatra ispravnim prijedlog da Predsjedništvo BiH imenuje Komisiju. Založio se za afirmaciju stanja u državi u kojem će ključne institucije BiH voditi najvažnije poslove kao i procese u vezi njih, jer to je budućnost BiH, pa je u tom smislu podržao amandmane g. Belkića i g-đe Sopta.

Diskusiji se pridružio i g. Jayson Taylor, zamjenik šefa Odjela za obnovu i rekonstrukciju u OHR, koji je ukazao na urgentnost donošenja izmjena i dopuna Zakona jer se njegova implementacija treba vršiti prije 1. januara iduće godine. Predložio je da se na sjednici Predstavničkog doma procedura uprosti i provede spajanje prvog i drugog čitanja te zakon brzo donese.

G-đa Ruža Sopta je ostala pri uložnim amandmanima. Istakla je okolnost da je uloga Komisije veoma važna u implementaciji Aneksa VII i zato predlaže da Predsjedništvo BiH izabere Komisiju.

Svoje doprinose diskusiji iskazali su i drugi članovi Komisije. G. Bešlić je, podržavajući amandmane i rješenja pojedinih predlagača posebno ukazao na mjesto i ulogu općina u aktivnosti povratka izbjeglica i raseljenih lica.

Predsjedavajući Komisije, g. Jahić se i sam dotakao amandmana i iskazao im podršku, smatrajući potrebnim da se Komisija opredjeli na pravi način i da donese Prijedlog zakona.

Na osnovu svestrane rasprave o ovom zakonu, Komisija je jednoglasno: podržala principe predloženog zakona, prihvatila navedene amandmane i prihvatila tekst Prijedloga zakona o izmjenama i dopunama Zakona o izbjeglicama iz Bosne i Hercegovine i raseljenim osobama u Bosni i Hercegovini i zaključila da je predloženi zakon neophodno donijeti odmah, te ga upućuje Predstavničkom domu Parlamentarne skupštine Bosne i Hercegovine u daljnju proceduru usvajanja. Pored teksta Prijedloga Zakona, Komisija je usvojila i slijedeće amandmane:

#### **AMANDMAN I**

U članu 23.a. stav 2. brišu se riječi «u ime» i zamjenjuju riječima «uz saglasnost». U istom stavu, rečenica zadnja, brišu se riječi «Vijeće ministara» i zamjenjuju s riječi «Predsjedništvo». Takođe, u zadnjem stavu brišu se riječi «Vijeće Ministara» i zamjenjuju s riječi «Predsjedništvo».

U članu 23.a. stav 2. iza teksta «a Vlada Brčko Distrikta BiH predlaže jednog člana Komisije» dodaje se nova rečenica koja glasi: «Ministar za ljudska prava i izbjeglice, obavezno je jedan od članova ispred Vijeća ministara Bosne i Hercegovine».

#### **AMANDMAN II**

U članu 24.a. dodaje se novi drugi stav koji glasi: Direktor, predsjednik Komisije i ministar Ministarstva za ljudska prava i izbjeglice trebaju biti predstavnici iz reda sva tri konstitutivna naroda Bosne i Hercegovine»

#### **AMANDMAN III**

U članu 24.b. stav 2. brišu se riječi «Konsultacije sa Komisijom» i zamjenjuju riječima «saglasnost Komisije».

#### **AMANDMAN IV**

Član 30. koji postaje član 27. u okviru člana 12. Prijedloga zaklona, zamjenjuje se i glasi: «Ovaj zakona stupa na snagu 8 dana od dana objavljivanja u «Službenom glasniku Bosne i Hercegovine».

U skladu s članom 89. Poslovnika Predstavničkog doma Parlamentarne skupštine Bosne i Hercegovine, Komisija je za izvjestioca odredila predsjedavajućeg Komisije Elmira Jahića.

**Ad. - 3. Izvještaj podgrupe Komisije o predstavci grupe građana sa Tržnice Arizona,**

G-đa Ruža Sopta je detaljno informirala članove Komisije o radu podgrupe za predstavku građana s Tržnice Arizona. Podgrupa je imala svoj sastanak na kojem je razmatrala problem te zaključila da je neophodno provjeriti određene navode kod organa Brčko Distrikta, kao i kod podnosioca predstavke i s njima provjeriti aktuelnost ovog slučaja. Na bazi tih utisaka i sakupljene dokumentacije, ona će donijeti svoje zaključke.

**Ad. – 4. Tekuća pitanja.**

U ovoj tački dnevnog reda, predsjedavajući Komisije je inicirao određene izmjene i dopune ranije donesenih Zaključaka o Strategiji za sprovođenje Aneksa VII Dejtonskog sporazuma. U diskusiji su učestvovali poslanici: Selim Bešlić, Muhamed Altić, Ruža Sopta i Tihomir Gligorić.

**Zaključeno je da se u zaključku broj 7c ranije formuliranih zaključaka, učini ispravka, tako da umjesto ranijeg teksta, novi tekst zaključka 7c glasi:**

**“- istaknuti određene oblasti i regije BiH kao prioritete pomoći u povratku, a na osnovu utvrđenih kriterijuma, kao što su: zainteresovanost za povratak, zapostavljenost u dodjeli dosadašnje pomoći, kao i drugih kriterijuma koje će definirati Vijeće ministara, na prijedlog Komisije za izbjeglice i raseljena lica,”**

Poslanik Selim Bešlić je predložio, a što je jednoglasno usvojeno od članova Komisije, da se izvrši posjeta Crnom vrhu i drugim značajnijim lokacijama, masovnim grobnicama i mjestima sakupljanaj ostataka žrtava rata. Na osnovu izvještaja sa obilazaka da se sačini akt Komisije sa porukom kako pomoći ustanovljenim komisijama i pojedincima koji traže nestale osobe.

Završavajući ovu tačku dnevnog reda, Komisija je završila 7. sjednicu. Sjednica je završena u 12,40 sati.

SEKRETAR KOMISIJE

dr Zijad Hasić

PREDSJEDAVAJUĆI KOMISIJE

Elmir Jahić